

**Ulloq 25. Marts 2015**

**Meeqqanut suli atualersimannngitsunut naleqquttumik Kullorsuarmi perorsaanikkut ineriartornissamut neqerooruteqalersinnaanermut tunngatillugu sanaartornikkut pisariaqartitsinerup misissuiffigneqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Misissuinermut ilaliullugu kommunimut pineqartumut inasuteqaatinik suliaqartoqartariaqarpoq, nammineq killiliussat iluanni pisariaqartitsinerup tamatuma naammassiniarneqarsinnaanera pillugu.**

(Inatsisartunut ilaasortaq Hans Enoksen, Partii Naleraq)

Siullemik Siumumiit qujassutigissuarput Kullorsuaq immikkut taallugu meeqqat atualersimangittut eqqarsaatiginerullugit sanaartornikkut pisariaqartitsinerup misissuiffigneqarnissaanik siunnersuuteqartoqarmat.

Taamatulli aallaqqaasiinera isumaqartinneqassanngilaq ukiut siuliini ukioq mannalununaqarfimmut qulaani taaneqartumut tunngatillugu iliuseqartoqarsimangittoq.

Siumumiit ilisimavarput meeqqat atualersimangittut nunaqarfimmi pineqartumi (3-6 ukiullit) qujanaqisumik annertuumik sammineqartut. Aammalu sammineqarnerat pilersarusiukkamik ingerlanneqartoq 2015-mut ingerlaqqimmat. Taamatut samminninneq Inatsisartut inatsisaat nr. 16 3. December 2012-meersumik aallaaveqarpoq.

Suut tamarmik imminnut ataqatiginnerat inatsimmi siuliani taasanni takuneqarsinnaavoq, taamaammatt nuannerpoq paasillugu nunaqarfimmi taaneqartumi meeqqat atualersimangittut sammineqarneranni peqataatitsineq annertoq anguniarlugu iliuseqartoqarmat.

Taamaammatt suliniarneq nunaqarfimmi nukiit pioreersut peqataatillugit ingerlanneqartoq Namminersorlutik Oqartussaniik suleqataafigissagippat kaammattuutigerusupparput.

Nunaqarfik taaneqartoq nunatsinni nunaqarfiit annersaasa ilagivaat, aamma oqaatigisariaqarpoq innuttamigut “inuusuttorujussuummat” tassa 18-nit inorlugit ukiullit nunaqarfiup innuttaasa

sisamararterutigimmassuk. Tassuuna takuneqarsinnaavoq nunatsinni inoqarfiit minnerit avinngarusimasullu eqqarsaatigalungit “inuusuttorujussuummat”.

Taakku oqaatigereerlugit inatsisartunut ilaasortap Hans Enoksen-ip, Partii Naleraq, Kullorsuarmi meeqqanut atualersimanngittunut periarfissaasa misissuiffiqineqarnissaanik siunnersuuteqarnera Siumumiit taperserlutigu ataatsimiititaliamut susassaqtumut ingerlateqqinneqarnissaa inassutigaarput.

Aammali kissaatigissallutigu inoqarfiit allat, Kommuunit peqatigalugit, meeqqanut atualersimanngittunut periarfissarititaat misissorneqassasut.

Jess Svane

Siumut